



**Najugaq qimannagu inunnik isumaginninnermut siunnersortitut ilinniagaqalernissaq anguniarlugu suliamik aallartitsinissamik periarfissaqaleqqullugu Naalakkersuisut peqquneqarnissaannik apeqquteqaat aallaavigalugu oqallinnermik siunnersuut.**

(Naleraq)

Siunnersuummut Naleraq qujaffigaarput.

Inunnik isumaginninnermik siunnersortinik amigaateqarnerput qularutigineqarsinnaanngilaq, qanorlu amerlanerusunik peqalersinnaanissatsinnut qáqqiissutissanik nassaarnissarput qujanassagaluaqaaq. Maannakkut inissisimaneq imaappoq, inunnik isumaginninnermik siunnersortitut ilinniarniaraanni Nuummi Ilisimatusarfimmi kisimi ingerlanneqarsinnaavoq, ukiumut 20-nik ilinniartunik tiguisinnaallutik. Inunnik isumaginninnermut siunnersortit maannakkut imaluunniit siunissami amigaatigineqartunut naammagutinngillat.

Taamaattumik nutaamik eqqarsartariaqalerpugut. Matumani inunnik isumaginninnermut siunnersortitut ilinniarnissamut najugarisaq qimannagu periarfissaalluarsinnaagaluarpoq. Nuuk avataaniittut inunnik isumaginninnermut siunnersortinngorusussinnaasunik peqarsimassagaluarpoq, Nuummulli nuunnissaminnut arlaannik peqquteqartumik kajungernatik.

Najugarisaq qimangikkaluarlugu inunnik isumaginninnermut siunnersortitut ilinnialersinnaaneq inuusuttunut Nuuk avataaniittunut inunnik isumaginninnermut siunnersortinngorniarusuttunut ajornannginnerulersitsissaaq aammalu suliffeqarnikkut periarfissagissaarnerulersitsissalluni, siornatigut periarfissaasimangikkaluartoq. Inuiaqatigiinnilu siammasinnerusumik inunnik isumaginninnermut siunnersorteqalissagaluarpoq, Nuummiinnaanngitsoq.

Apeqqullu akineqartariaqarumaartuuvoq, najugarisaq qimangikkaluarlugu inunnik isumaginninnermut siunnersortitut iliniarsinnaaneq sumi inissisimassanersoq. Ataasiinnaassanerluni imaluunniit kommuunit tamakkerlugit najugarisaq qimangikkaluarlugu inunnik isumaginninnermut siunnersortinngorniartoqarsinnaassanerluni?

Demokraatit isumaqarput isumassarsiaq misissorluarneqarsinnaasoq. Misissuinerup inernera atorneqarsinnaassajunnarsivoq, imaassinnaammammi ilinniarfiit allat aamma najugarisaq qimangikkaluarlugu ingerlanneqarsinnaanerlinik naliliissasoq.

Tassa oqallinnermut Demokraatit ilanngussassaat.